

四庫全書

集部

欽定四庫全書

集部  
穀齋集卷一至三

詳校官檢討<sub>臣</sub>羅國俊

中書<sub>臣</sub>劉源溥覆勘

覆校官編修<sub>臣</sub>汪鏞

校對官學正<sub>臣</sub>常循

謄錄監生<sub>臣</sub>潘河

欽定四庫全書

集部六

毅齋詩文集

別集類五明

提要

臣等謹按毅齋詩文集八卷明王洪撰洪字希範錢塘人年十八舉洪武丁丑進士初授行人尋擢吏科給事中成祖時以薦入翰林由檢討厯官修撰侍講為永樂大典副總裁官明史文苑傳附載林鴻傳中稱成祖嘗命

洪為文洪逡巡不應詔為同列所排不復進  
用而是集有劉公潛所作輓詩序及莫琚後  
跋乃言洪預修國史會大臣欲載其家瑞異  
入日曆中洪持不可至聞於成祖前坐謫禮  
部主事卒於官曾祭輓洪詩所謂玉堂分職  
見孤忠亦指是事明史蓋偶遺也此集即莫  
琚所編雜文皆樸雅駢體亦工詩尤具有唐  
格而不為林鴻高棟之鉤摹其序文及序書

二篇立論具見根柢其序胡儼詩集謂至元  
天厯間趙虞范揭各鳴一時之盛及其衰也  
學者以粗豪為壯以尖新為奇語言纖薄音  
律怙憑論元末之弊至為切中則洪之所見  
高出當日遠矣雖名位不昌要為有明初年  
屹然一作者明史文苑傳稱王偁預修永樂  
大典學博才雄自負無輩行獨推讓同官王  
洪則洪之文章槩可見矣乾隆四十二年八

月恭校上

總纂官

臣紀昀臣陸錫熊臣孫士毅

總校官臣陸費墀

欽定四庫全書

毅齋集卷一

明 王洪 撰

賦

瑞象賦

瑤光之精至和之珍彩霞之色景星之文茲其所謂瑞象而特應於我聖君者乎爾其始生也協陰陽感星辰集衆靈走百神幹玄鈞以凝化孕太和而萃真吸沆瀣於夜月耀華彩於朝暾鬱律崢嶸魁壘嶙峋巍然而行

屹然而蹲突若山峙翥若雲屯其文彩也則璀璨灼爍  
輝煌燦奕皎纍纍而含珠郁彬彬而間璧玉輝輝以凝  
素瓊斑斑而點碧丹霞照而紫氣騰玉露潤而祥光溢  
遠而望之燦然如繁星之耀蒼旻近而觀之朗然如晴  
雪之映朝日也爾乃濯浴清波翱翔瓊島徘徊芳林咀  
嚼瑤草含和而鳴則嘉氣合而清風生臨高而居則靈  
芝茂而慶雲繞蠻夷覩形以奔告蕃王焚香而致禱茲  
實應我中國聖人之在位特生此為太平之瑞寶也於



是姑以素玉之英沐以碧醴之泉縻以五色之綬航以  
萬斛之船越滄溟於萬里效職貢於九天舞蹈於金闕  
之下盤旋於玉階之前瑞日照耀榮光昭宣龍顏眷而  
天意悅千官賀而懽聲傳於是時也玉京啓寶殿成三  
階平萬國寧禮樂明備功崇德弘四靈咸至諸福畢呈  
藹蒼麟之來儀雖丹鳳之和鳴蔚神岳之玄兎越海陬  
而貢大廷出凡類而超羣生遊靈囿之清高聽鈞天之  
鏗訇蔭玉樹之芳華飲瑤池之清冷于以承恩顧于以

昭文明亦何其幸歟不特此也固將立明堂侍法宮駕  
龍輿于九天之上導玉輅于五雲之中登泰壇而展大  
禮陞清廟而宣孝衷昭萬年禮樂之盛應上天福祿之  
隆儼瑞圖而繪質煥靈篇而著功然後知茲象為國家  
太平之上瑞而千萬年之奇逢也豈徒為形質之環異  
與羣獸之雄而已哉為之歌曰乾錫瑞兮坤獻禎炳其  
文兮發光英越海外兮獻帝廷瑞聖德兮昭文明永萬  
年兮承天慶

瑞應麒麟賦

永樂十三年八月麻林國貢麒麟翰林修撰臣王  
洪為賦以獻其辭曰

惟聖皇受天命御四海盛德與天比崇洪業與地侔大  
幅員六合亘乎無外統和天人茂毓庶類萬姓阜業百  
蠻執贄和氣藹以春暢嘉應翕而雲萃於是至仁之獸  
粵若麒麟者自海外遠域萬里而効瑞觀夫麟之為狀  
也瑰瑋曄昱醇懿沕穆質振振以翹峙采晔晔而素燭

性煦煦以內和氣融融而外郁偉哉神乎茲之為獸蓋  
以紀雲篇而協瑞圖昭文明而申景福也於是徐察其  
形則足若神驥體肖靈麇瓏瓏殷殷熿熿彬彬目若景  
星熠耀精瑩上燭蒼旻脊若靈龜昭布人文經緯乾坤  
又象乎神駒出滎河擁瑞雲葳蕤紛綸照耀龍鱗奇偉  
神異不可殫論若乃稟至仁含太和于嗟趾定容與婆  
娑樂生物之繁茂惜嘉卉之婀娜妥柔角紆靈步回首  
若顧摩趾若撫昂若仰靡若俯圓中規方中矩時然一

鳴應鍾協呂和音翕以四達協氣盡以弘布獬豸屹立  
以傍侍鵠鵬繽紛以後翥彼千仞之鳳凰眈翩翩其下  
舞於是或騰崇峻之山或遊泱莽之野或飲清冷之泉  
或蔭芳華之樹雨師警塵風伯清路太乙含輝以先導  
衆神景從而為馭足之所至身之所處則睜然而膏雲  
冷然而甘雨醴泉流川靈芝芬敷蓋以昭迹遠方獻祥  
帝都以彰聖德周萬方而洽九土于是時也羣臣萬姓  
莫不忭躍快覩咸北面稽首曰允哉茲麟昔在黃園帝

德以明載游周郊王道以成今茲越遠徼超滄溟登青  
雲而獻大廷厥應何從惟德之徵不然何其煌煌其神  
且靈也蓋惟我皇神聖文武憲章禮樂率遵聖祖茲武  
王大孝繩祖武而受天祐也敬祀天地宗廟社稷神錫  
嘉福茲成湯顧諟明命罔不祇肅也欽若昊天敬授人  
時好生之德期于無刑茲堯舜奉天勤民而仁育羣生  
也於是稽帝典考王度狩都邑撫黎庶時乘六龍肆覲  
羣后懷柔神祇存問父老湛恩洋溢施于夷夏六合之

內八荒之外攘攘藉藉懷生之物莫不浸潤膏澤昭朗  
愷懌同底于壽域百神和而效祉上帝悅而降福是以  
若茲仁獸郁乎飈至纚乎彙集扶幼示恩歸昌表德來  
乎遐邦以見神化之敷于遠疑乎獨角以著天下之定  
於一於惟盛哉且夫白魚躍舟至微也鳳鳴岐山至近  
也猶燎以告功垂美後脩況赫赫奕奕若是其盛者乎  
是宜鏤黃金之牒紀白玉之冊樹凌雲之碑揚配天之  
績宣鴻禧申景錫蜚英聲騰茂實使萬世永永服我功

烈帝謙讓而未俞也訓羣臣謹庶職求遺賢褒有德篤  
乾乾勵翼翼嘉旅獒美無逸放茲麟於靈囿從逍遙而  
自適以禮樂為華儉朴為質較邃古之淳風趨陶唐之  
盛跡昭乎永景命于萬年而播鴻名于無極也謹作頌  
曰

帝德天覆民之熙熙甘雨時布萬物以滋符瑞衆應厥  
惟昭茲振振仁獸賁其來思遊我靈囿穆穆其儀昔聞  
其名今覩其來仁哉麟哉維德致之維帝時訓維敬以



祇咨于臣鄰以贊以毗于千萬年永茲繁禧

觀燈賦

有序

伏惟皇上奠安乾坤統御華夷民物阜康率土效  
職詔於上元之夕特賜燈宴嘉與萬國同樂太平  
聖恩周洽臣民歡慶臣洪幸生聖明獲覩盛事而  
其職業又在贊述功德謹作賦一篇鋪張形容以  
紀盛美其辭曰

惟聖皇之龍飛御天也弘萬世之盛業冠百王之神功

義威烜赫乎宇宙仁恩洋溢乎華戎六龍時巡萬國來  
同昭人紀凝天工嘉咸寧美時雍於是設太平之偉觀  
與四方萬國樂時和而歲豐也于時太昊司晨青陽屆  
節瑞紀書雲禎祥應雪和風初扇祥藁半茁羲和卜日  
以獻吉宗伯考儀而進說虞倬草圖以承命魯班董役  
而就列攢瓌材之磊砢起崇構之巍嶸出巨鰲於滄瀛  
聳神山於金闕其宏壯也則齊雲萬重凌空千尺橫峙  
霄漢高迎瑞日藹翠華之歲蕤翁祥烟之葱鬱居庸北

拱太華西揖玉臺並峙金莖對植萃和氣於九重映層  
霄於一色於時繪飾五彩燈懸九華奇巧偉麗繽紛交  
加燦若聯珠爛若蒸霞煥若濯錦芬若揚葩芍藥並植  
以競秀芙蓉憑虛而吐花尺紆千纈寸眼萬羅雲母灼  
其含朝光琉璃瑩其澄秋波彩枝婀娜以風轉素羽蹁  
躑而雲摩於是寶月澄空金鐘告夕有司具奏鑾輿乃  
出開闔闔於中天奏簫韶於空碧舉霞觴肆瑤席萬戶  
啓千門闢忽一為之輝煌倏萬花之炫赫固有象乎列

宿之昭回拱北辰而環紫極虎翼右拒龍角左植玄武  
呈析津之瑞丹雀表文明之德帝座中尊蕃衛外翊紆  
閣道之崔嵬挺華蓋之絕赫嚴侍衛于勾陳昭德符于  
太乙燧文昌之崢嶸煥九霄之奎壁遠而望之朗乎慶  
雲開而耀玄文近而察之煥乎登天庭而仰宸居于咫尺也於是衆樂畢陳羣臣咸集按八風調六律子野撫  
琴瓠巴鼓瑟師襄擊磬后夔拊石然後奏巴謳發吳歎  
舞陽阿歌康衢迴陽和于玄谷過行雲于紫虛呈犂軒

戲都盧魚龍凌雲以曼衍猿猴緣木而紆徐躍飛騎於  
帳端舞瑞獅於階隅或擬販繒於都市或效採蓮於江  
湖跳踣跚之龜鱉走負負之蟾蜍觀長人之宕蕘訝竚  
民之侏儒山鼻胡容拳髮蠻雛握通犀手明珠籠鳳凰  
盤珊瑚蹈厲回旋俯伏睢盱又有虞初稗官引詩說書  
譴陋嘲貪表賢誠愚至若童稚簫鼓以嬉戲農夫蓑笠  
而耕鉏父老偃僂遨遊門閭曳杖步屨莪中長裾烏犢  
前牽黃犢後驅聖心每悅於民事天顏屢視而怡愉鴻

臚光祿奔走先後千盤傳炙萬甕行酒珍羞錫海內之  
所無仙果出人間之未有爾乃下靈祇朝仙真引丹鳳  
于蓬丘來青鳥于崑崙或跨蒼虬或駕祥麟或乘雲輜  
或馭飈輪華芝薦芳蟠桃獻珍祝聖皇之萬壽與萬國  
而皆春鴻恩洽大禮備萬國懽群臣醉仰九重呼萬歲  
然後放金花於火樹揚紫燄於雲騎轟雷鼓警宸衛聖  
駕興臣民退於是時也家家有和寧之樂處處享安平  
之治溢喜氣於寰區徧歡聲於天地是皆由夫聖皇恭

儉勤民故天錫之以豐穰仁慈愛物故神效之以嘉瑞恩  
周乎覆載之所極明燭乎日月之所至憂以天下初濟  
大業於艱難樂以天下乃與斯民相安於無事是故功  
高乎三王德隆乎五帝雅頌所不能陳簡冊闕





欽定四庫全書



欽定四庫全書  
欽定四庫全書

潤威洽乎覆載之所極東夷西戎南蠻北狄越山海以  
獻珍襲冠帶而效職仁風之所吹煦神化之所盪滌莫  
不革獷戾以柔恬服猜暴而順適是以若茲之神獸越  
萬里而來格涉流沙歷西極登天門翔帝室九重顧瞻  
以欣豫百僚縱觀而抃懌是師也乃斂威弭伏含和容  
與足躔躔其若蹈首靡靡其若俯口煦煦其若鳴尾續  
續其若舞若翔踴而自怡慶遭逢於聖主仰榮耀於中  
天脫塵凡於下土于以登靈囿而遊瓊林飲瑤池而蔭

玉樹聆鈞天之韶音樂騶虞之嘉侶亦何其幸歟至若  
圖形於干壯軍容而耀國威登像於屏守金門而鎮玉  
戶期委質以效忠同師臣之孔武臣載筆於東觀幸承  
恩而快觀仰聖德之弘敷慶神物之嘉遇拜閭闔而獻  
詞播皇風於千古

謹按唐太宗貞觀中西域貢師子其時侍臣虞世南  
為賦以獻今聖上神聖功德度越漢唐而臣幸以文  
字叨列侍從觀茲盛美不敢以不及古人為解謹為

賦如右時與士大夫誦而觀之以詠歌聖德於無窮  
又何其幸歟冬十月九日臣洪謹識

麒麟賦

粵有瑞獸其名曰麟稟乾元之正色被神龍之奇文柔  
角豐隆而上植靈德溫淳而內馴郁郁穆穆彬彬振振  
茲豈非帝王之上瑞而特應於我聖君者乎爾其始生  
也協陰陽感星辰集衆靈走百神開闔化樞斡旋天鈞  
玄枵毓其精富媪孕其真至和凝其質太灝宣其文祝

融揚光以照野風伯先驅而警塵胚胎渾以神化與萬  
物而皆春其為形也天駟賦足靈膺肖身抱順獨立含  
和自珍屹然而跼粲乎若丹鳳之映日躍然而舉矯乎  
若神虬之凌雲望其目若景星之耀華采視其脊若靈  
龜之負人文至若其行則高下中程進退合度避生物  
而不踐擇高明以自處惟步武之圓方乃自然之規矩  
其鳴則或宮而溫或商而清五音和八風平伶倫擬之  
而按律師曠寫之而象聲是故遊於山則象車垂鈎丹

芝敷榮飲於水則玉醴流香玄珠夜熒林棲而甘露降  
野秣而嘉禾生偕神明而共居豈罟網之可嬰必聖人  
之在位乃呈祥而效禎惟我聖皇文武仁明跨四海以  
為家冠百王而作程軼淳風於邃古沛鴻恩於八紘雲  
行雨施而羣生咸育地平天成而萬邦永寧來職貢於  
梯航端冕旒於穆清元氣綢繆太和薰蒸是以若斯之  
仁獸自遠國而來庭也爾其越洪濤濟滄溟海若警蹕  
陽侯抗旌超鯨波於瞬息欵天關而獻呈召羣公集六

卿奔林虞走水衡稽靈篇啓瑞經登閭闔之嵯峨歷玉  
臺之崢嶸仰龍顏於咫尺聆鈞天之鏗鐳容與紆徐不  
震不驚重瞳為之怡悅百辟為之懽騰慶希世之未覩  
藹洋洋之頌聲當是時也人紀立天功凝景星明泰階  
平玉衡貞寶甕盈諸福至百穀登信皇仁之遠被而王  
化之大成也噫斯麟也應天而生待時而出遊於囿而  
昭帝德之祥出於郊而永倉姬之厯彼漢閣之穹窿揭  
嘉名之烜赫啓炎精之景運偉中興之丕績祕靈跡於

千年固有俟於今日是固將乘慶雲鳴和風遊靈囿侍  
法宮朝飲玉泉之清冷暮食瑤草之丰茸拜於庭而鳳  
凰儀立於墀而獬豸從先百獸以率舞昭聖德於無窮  
表

慶賀醴泉出神樂觀表

伏以聖人御宇仁恩普洽於萬方天命垂祥景貺誕貽  
於九土凡在幅員之內咸沾瑞慶之隆海宇均懽神人  
胥抃臣聞惟德可以動天無遠不届惟誠可以格神有



感必通禎祥無虛出之符天人有必至之應矧茲醴泉  
之上瑞實為盛治之休徵欽惟皇帝陛下天縱聖神日  
新德業垂衣裳而治天下萬國歸心奉圭幣以事郊禋  
百神受職仁化弘敷於率土孝誠昭格於皇天華夷仰  
覆載之恩草木荷生成之惠是以坤靈協應水德獻珍  
懿茲若醴之甘泉出此事神之福地慶雲甘露光啓其  
祥白鶴青鸞載昭其應謹按鵲冠子曰王者之德上及  
太清下及太寧中及萬靈則醴泉出孝經援神契曰王

者德至淵泉則醴泉出瑞應圖曰醴泉者水之精也味  
若甘醴可以養老飲之令人壽禮緯曰堯德匪懈醴泉  
出山然則斯瑞自古所稱祥源允鍾於地靈瑞應實由  
於聖德冰凝鏡徹味旨醴甘演慶流於無疆躋民生於  
遐壽鴻圖永固帝道益隆臣某等忝班朝著欣覩禎符  
涵泳恩波頌皇仁於九有仰瞻天日祝聖壽於萬年

穀齋集卷一

欽定四庫全書

穀齋集卷二

明 王洪 撰

古樂府

艾而張

畋彼南山艾而張羅黃雀高飛其如雀何有虎有虎南山之下朝出啞人暮行于野我有長劒亦有勁弩胡不我即乃復彼微者成湯祝網天下歸仁除暴懷柔永康我兆民

朱鷺

振朱鷺飛戾天或下而食啄我茹與蓮我不汝捕于以  
振我鼓不以茹不以吐昭我聲名奮威武德音無違永  
綏此九土

雉子班

東方日出露未晞羣雉角角鳴且飛雌從其雄雛後隨  
羽毛五色紛葳蕤分場啄飲占所宜我草我野我泉池  
或東而西衆擊之綉頭斷錦翼披采色豈不美恃勇而

懷反為黃雀之所嗤君不見鳳凰雛雛食竹實逍遙太和安所適

戰城南

朝出戰徐吾南莫出戰祁連北軍聲遙驚瀚海翻殺氣直入天街白自古聖人以五兵治不道腹心爪牙各矢厥謀力為民除殘去蝨賊胡為彼頑不我率揮我天兵奮長戟虎嘯咆哮鷙鳥擊薄其穹廬夜不食招搖為我怒弧矢為我直參旗開張虎奮翼蹀胡之血斫胡之頭

懸之藁街竿百尺戎胡萬里恒威德一身為長城四海  
永寧謚下傳子孫上寧邦國聲施千秋永無極

臨高臺

今日不樂登彼高臺吹竹彈絲與君徘徊發我浩歌酌  
我金罍顧望四山鬱何崔嵬人生若寄多憂何為歲月  
既邁曾不我遲皎皎明月泥沙蔽之靈螭雲飛蜚且制  
之織女在室不秉機杼惟星有驚不可以釜黃鵠一舉  
戾于雲衢啁啁鶯斯哂之枋榆莫高匪山莫深匪海玄

穹為幕長河為帶招彼黃鵠俾為君駕君坐而馳我以為御超厥泰邃歷天而遊逍遙無為以永千秋

上陵

上諸陵眺西土佳哉山川鬱四固函谷為關金城為戶  
陸海萬里河渭在下芟蒿萊拓土宇允懷我高祖懷高  
祖五年馬上饑不及食頭髮若蓬葆服此勞苦傳子孫  
謹厥度永綏此九土明明赫赫昭厥上下天命良不易  
坤為輿乾為蓋振洪恩遐哉沛神功邁三王仁風洽四

金史卷一百一十五  
卷二  
海俾彌歲萬億基業無有壞

巫山高

巫山高高入雲烟青壁萬仞下深淵叢林杳杳霧雨冥  
冥上不見日與天驚湍迅洑不可以渡懸崖深谷日夕  
愁鳴猿嗟哉客子行路何獨難在昔草昧元政微夏氏  
竊國恣淫威聖人龍飛不我歸跳梁踊呼肆彼鼠與鴟  
鐵鉅高張矢石四圍王師若雷霆奮厥虎與羆碎高城  
塞深池縛其囂童來獻京師自古立國以德天乃不違



恃險而虐鮮不顛以危矧彼昏狡自速禍灾三塗洞庭  
古所規

將進酒

將進酒待嘉賓設朱懸肆華茵琴瑟御鐘鼓振藹穆穆  
肅肫肫情之暢禮愈敦乞周行佇令言仰熙陽廓昏氛  
挹冷風濯沈疇賓前席跼自陳古之戒竊所聞耽麴蘖  
比匪人欲敗度性失真業既隳身亦淪惟清淨道之珍  
儉而恭德之醇天助順民歸仁古成敗咸此循請司爵

書諸紳

卷二

有所思

有所思思美人疇昔見之魯東門顏如苕華髮玄鬢羅  
裙翠袖翩若雲膏沐芳馥口吐芬衆人求之心匪親自  
成繾綣獨予勤彈絃哀吟妙入神三星在戶夕向昏謂  
我車來泗之津臨行贈我悅與巾胡為一別今三春思  
而莫見我心焚攬衣出門仰蒼旻北風蕭蕭鴈南賓牽  
牛織女東西陳兩心一意含莫伸含莫伸將焉匹願為

黃鵠並雙翼遨遊青天樂無極

古歌曲

大明鏡歌鼓吹曲 一十一首

龍之飛自淮圻元之昏民曷依紛猘猢肆淫威匪聖神  
孰拯之皇受命莫羣黎握乾符頓坤維翼風雲駕電雷  
衆靈協羣英隨斲梟獍戮鯨鯢定九州綏四夷澤之滂  
遍九垓煦以仁慘者怡聖化溥皇風馳一戎衣四海歸

右

皇基肇惟聖神邁義威揚皇靈越天塹波不驚奠群黎  
嶸者平階天壤家八紘海之地獄乃成萬邦式四海寧  
極無外畢來庭命允固仁彌弘校遠古峻莫京

右

番之水彌太清有孽者蛟獠不寧汙澤為窟潦作城狼  
噬虺毒干天刑帝震怒揮天兵祝融助順神雷轟灰彼  
骨投玄冥老孽死子仍桀鼠狐跳躅尚守故穴寸綆繫  
之刃不血疆宇誕寧四海悅

右

逖彼閩粵斗絕海域有窮其魁式頑驚且逆自謂僻且  
遐據釜假息蛙怒鼠偵敢悖我有德帝命赫王師奮如  
虎如螭往殲厥命匪師之威皇之訓不梟其頑民曷定  
漠漠遐裔茫茫羣氓出彼霜電同陽春萬里烜赫揚皇  
仁海波鏡淨無纖塵東極日寔盡來臣聖功億載昭無  
垠

右

潼關高秦華壁立河為壕樞制四海閩隴洮有威不捷

德乃牢

闕

右

狄之窮矣既昏以渝下民燠休甚毒於荼穆穆皇仁若  
躬其痛命厥元戎乃虎乃貔勿恃桓桓惟仁之敷于炎  
于涼于醒其蘇狄勢既窘角崩肱慄撤其穹廬中夜以

北匪余殄之皇天是殛殛之維何祚我有德皇德旃爛  
乃冠乃服幽窟鬼區畢來受職功軼古初德流罔極烝  
哉弘圖于萬于億

右

曠彼汾土孽嘯以狂挾其螢爝敢抗我太陽王師若雷  
霆孰我敢當悖者戕厥命順有顯光乃諭乃誘聿降其  
良其良既潰羣醜喪厥氣萬騎歛若天上墜身不得甲  
袒而逝皇威載廓并異安以治

右

吳之疆土茫茫糗糧山積貨海藏何辰不淑豢此虎與  
狼羣飛旅嘯謂莫我敢當飢食人飽翱翔自肥其軀氓  
畢戕氓畢戕皇威赫折其牙角斲乃窟老雄羝觸狼而  
愎羣奸勢窮內自食閉目而踣就予辟勅冠旣殲四海

一

右

氓峨奠坤域巴劍阻重關彼雄有明氏乘時盜其間父



死子復繼苟此井蛙安曰我彈丸區四絕固已完曰我  
王者師桓桓復嘽嘽飛度井絡外雷霆摧丘山赤手搏  
窮狐弓弭甲不擐掉闕 尺組縛其昏童還飲至奏凱  
樂懽聲薄霄漢神化洽遠徼天威龍言羣蠻從茲億萬載  
永無西顧患

右

惟訏者蠻竊彼東土附于大海厥壤膴膴我師攸徂不  
威而舞曰我聖皇我父我母倒戈而迎拜命偃樓南金

大貝海錯維旅皇心孔嘉乃訓乃撫脫其黃輜授以文  
組有飢而哺有孤而乳惟皇之聖惟仁惟武風馳四夷  
不怒而附烝哉聖皇聿寧厥宇

右

狄之窮淫以渝天降命勦昏愚氓必瘳望來蘇皇聖仁  
握乾符命元戎授神謨連我熊螭斲枯魚崩厥角蹙以  
孤秣橐駝撒穹廬鑿其北牖中夜逋蕩蕩玄漠茫茫鬼  
區伏不敢南顧恐干神鉞擊之殂威聲振無外左衽辨

髮咸來朝帝都四海混一萬邦無虞

右



毅齋集卷二

欽定四庫全書

毅齋集卷三

明 王洪 撰

四言古詩

魯林懷思

并序

魯林懷思詩為太常寺丞孔公克準而作也孔氏  
有家於衢舊矣至公以淳茂莊慎遭際聖明擢奉  
常論德惟允深惟本源之義北瞻魯林眷言有懷  
因為圖以自見記曰樂樂其所自生禮不忘其本

君子於是謂公知禮故予作是詩以洩其思焉

鬱鬱魯林有枌有檀過我後裔于越之間一本中分愛  
念伊始我欲從之不遐甚邇于川于舟于陸于馬豈不  
夙夜于林之下巖巖魯山有廟奕奕羽籥琴瑟左右有  
繹衍我聖祖金石懜懜願言靡獲實勞我心明明我祖  
典常是紀恩被罔極詎曰厥世穡夫之良克念惟賢矧  
茲承德敢有不虔喬喬林木遺澤所萃穆穆我宗四方  
所視惟積斯高惟濬斯深匪古匪今茂是德音

五言古詩

擬古 二首

結髮有壯志仗劍遊三河  
方舟泝洪流擊節揚其波  
俯食首陽蕨緬懷商山歌  
我欲求茲人遺塚空嵯峨  
鴻飛已冥冥感慨何其多

有士在山澤五月恒被裘  
饑食商山芝渴飲潁水流  
世人不見巢許相與遊  
伊我欲求之巾車陟崇丘  
芳草滿澗阿松栢陰道  
周歡然延入室玄言為我酬  
願此謝

塵鞅卒歲以為儔

寫懷

春陽煦萬彙蒼鷹化為鳩腐草一何微熠燿乃宵流盛  
年不再遇流光忽已遒四十而無聞能不為我憂

擬陶彭澤

藹藹籬下菊衆卉恒蔽之涼飈颯然至妍華見幽姿有  
酒盈吾樽欣言及茲時幽鳥懷茂林潛魚樂深池且為  
懼此飲知命復何疑



和郭主簿

我家南山下前有嘉樹林好鳥鳴其顛涼風吹我襟泛  
此樽中酒撫我膝上琴禾黍亦已繁桑麻藹餘音知止  
良易足勞生非所任

張氏南溪草堂

稟性少諧俗養生殊寡營偶從田野居遂茲雲壑情攸  
攸水含波萋萋卉敷榮靄靄高榆閒喈喈春鳥鳴復茲  
微雨霽曠然山水清鳴琴坐日夕時復揮我觥多求徒

為累苟出良自輕栖遲此為樂孰謂無所成

酬蔣御醫見寄

策馬上西山望彼千里道  
洪河亘淮汜江流復浩浩  
伐木無遺音鬱哉興懷抱  
啁啁慕黃鵠蛩蛩戀芳草  
各勉日新志慰此平生好

擬銛公幹

園林多佳木秀氣何蒼蒼  
石梁冠崇阿綠水流芳塘  
行樂在良夜飛蓋復翱翔  
涼風振華纓明月揚其光  
清池

散夫容秋蘭一何芳君侯壯思發逸藻凌風揚小臣信  
愚劣狂歌安所詳

夜泊濟寧城下呈同舟諸公

璿杓麗清漢金波流素輝池荷散香氣堤柳度涼颼高  
城夕眺迴迴塘暝轉遲愛此良夜永佳人復在茲披襟  
一瀟散摘藻共芳菲曠懷頗云洽清觴亦累持中宵忽  
惆悵王事庶無違

中秋宴集分韻得斗字

商簫嚴次律堯蓂屆中候白露下高梧涼飈遞疎柳玉  
堂屬永夜金樽集良友行佇素輪出生敞華宴久初瞻  
碧雲腹忽吐滄海口高凌灝氣上獨出黃道右九霄豁  
清明萬里破昏黝鈞天靜聆曲廣殿細見臙兔壯玉鼎  
龜挂老枝蚺蟻竊丹想仙術弄斧慨神手合璧瑞已徵  
倚玉會斯偶肥燭薊北殺香薦江南酒伏雌始見抱鮮  
魴初脫留時果飮棗栗園蔬雜薑韭露葵甘若薺霜梨  
脆勝藕醉懽互促膝雄辯或揮肘騁博探九丘鈎秘紬

二酉善謔競語捷聯賦詫韻陡射隱角三三推數窮九  
九清輝轉娟媚涼意亦飈瀏夜靜數警柝更深屢瞻斗  
共欣良願愜載感皇恩厚清切登紫闥逍遙曳華綬  
微銜環報庶勉介石守學步久懲拙效顰更慚醜杼章  
倘予誨一報瓊與玖

送胡學士扈從北征

黃鉞揮天兵風雲拂龍旌聖皇振神武桓桓出邊城夫  
子一何幸載筆隨天營高材植嘉運逸氣橫蒼冥囊括

天下豪穎脫人中英獨抱經濟畧而窮王伯情篆刻工  
雕蟲恥為魯諸生學劍折援公談兵陋荀卿沈冥黃老  
書卓犖陰符經揮翰五岳震出言萬人驚浩蕩愜壯懷  
從茲振長纓劍劃浮雲高弓開秋月明銀鞍跨白馬飄  
忽若流星春風雪初消萬里沙場平借飭回天日草檄  
馳雷霆尺組縛渾邪一箭落撓搶瀚海烽火息大漠烟  
塵清歸來麟閣上千載揚高名

送金諭德扈從北征

鎧甲明珠袍黃金鏤寶刀萬里隨飛龍躍馬揮霜毫天  
營日月近玉帳風雲高春色照大旗邊聲入鳴鞘憑陵  
助膺揚卓犖宣龍韜長篳掃浮翳鴻爐燎纖毛累累犬  
馬羣投戈拜前茅生獲左賢王伐鼓鳴金鏡開邊壯衛  
霍揚芳邁蕭曹却笑燕頷人投筆徒為勞

應詔赴北京

束髮事書劍詞場造文雄趨朝立儀鳳倬直隨飛龍搞  
詞白玉堂奎壁羅晴空竭來兩鳳凰歛下青雲中口銜

五色書名對金臺宮羽林整樓船天閑賜青驄賦詩別  
同列飛蓋辨羣公日月行青天暉光燭微躬典謨紀聖  
德雅頌歌成功豈效草玄者蕭然成老翁

懷蔣良夫

崇蘭滿芳洲盈盈藹秋綠采之欲何贈念彼人如玉停  
雲渺遐思芳樽間幽躅相知豈無侶獨予勞心曲願持  
五絃琴一寄南飛鵠

過黃石祠懷留侯



神蛟脫秦網孤鳳游蒼冥微服楚澤間遂為圯上行老  
翁彼何士素髮垂華纓當橋叱取履箕踞若狂生願授  
一編書奇文閱縱橫片言幹神機千秋啟炎精孺子後  
見我黃石濟北城高山立遺廟振古揚鴻名慨彼井底  
蛙自多安所成

歌風臺

炎精自天啓黃屋凌空開富貴歸故鄉遂築歌風臺佳  
人弄瑤瑟故老持金罍酒酣自擊缶浩歌何雄哉颯爽

龍虎姿曠蕩風雲懷顧謂萬歲後英魂尚歸來回首望  
彭城孤臺亦崔嵬百戰功不成千載令人哀

題水仙花

二首

南國多佳人春風漢皋曲翠鬢而華裾逍遙湘水綠秀  
色不自獻芳香動盈掬蹇修其誰來期之在深谷  
幽思不可極蕩舟湘水間日莫遇佳人弄珠妖且閑馨  
香隨風發秀色若可飡願此托交甫解珮以為歡

聽徐徵士彈琴

客有海上仙逍遙來東粵手揮五絃琴為我鼓白雪悠  
悠蒼崖雲皎皎長空月清風忽散之餘音繞天末白鶴  
舞欲下遊魚出復沒微物尚有會況乃予心悅伊昔清  
廟瑟朱絃而踈越高山想遺聲沈河慨遐轍吾將和南  
風持之上金闕

胡祭酒席分韻得難字

日晏下彤閣復茲良燕懼藹藹衆君子華纓燦我冠嘉  
穀薦時蔬清觴疾飛翰鳴琴亦在御披襟時屢彈東山

莫逾往幽林靄遐觀談笑穆清風芳詞吐幽蘭願此樂  
終夕佳會良獨難

修竹詩寄沈公輔

修竹一何盛生此南山岑蒼松冠其陽靈芝蔽其陰蟠  
地下冥漠干雲上蕭森涼飈颯然至清籟時自吟幽響  
振虛谷秀色滋遠林丹山有奇鳥崑崙有珍禽羽翼何  
歲隼翻飛此嶇嶇交鳴沈寥外共栖蒼翠深離離啄佳  
實囀囀和好音坐閱歲時久豈為霜霰侵桃李發春墟

容冶競追尋夫容亦窈窕媚此秋江潯時至豈無華歲  
寒難比心猗猗誠為美亭亭良所欽因之賦淇澳永言  
諧素襟

耕讀堂為陳德庸賦

我昔居隴畝荷鋤事躬耕抱膝吟梁父而遺十載名谷  
雲遇長風吹之入太清雨露承恩澤日月迴光榮銜環  
徒虛報素餐空媿情竭來識夫子卓犖南中英手握明  
月珠鴻飛入冥冥禾黍滿近疇青山對前楹獨坐閱遺

編心與前賢并大畧陋章句高談鄙縱橫興來發商歌  
金石揚遺聲傳子懷巨川謝公濟蒼生功成倘相見攜  
手凌蓬瀛

懷內 五首

予與劉氏婚幾一月予先還南京劉從其母後至  
久而有思作詩寄之

燕婉懽未洽翻此離恨端羅衣莫未襞朱燈繁以繁芳  
樽對琴瑟展轉不能宣何異鴛與鴦乃茲鴻燕然

我馬夙已馳子車亦已戒悠悠途路間惻惻郊野朔  
風卷枯蓬玉顏為之改豈不罹苦辛賴有親與愛

言徂至京國宛若歸故鄉入門見童稚整衣拜高堂隣  
里欣來適更具酒與漿中厨其孰營能不懷慨慷

我別既云速子來良不緩躊躇念茲晨涉彼江之岸浩  
浩起風波靄靄雨繁霰目短心苦遙日夕徒累歎

周詩詠窈窕王睢托微言保茲義與恩令德在無訾鳳  
凰栖高梧牛女亦在天引領冀良晤永以諧百年

送曾叔固還廬陵

時雨淨炎旦嘉樹藹涼颼高閣送層雲逶迤映清池素  
懷同所欣詎云茲別離離離川路長渺渺孤舟遲夫容  
始分葩幽蘭亦葳蕤覽物豈無悰言歸會有期所嗟騷  
人贈揭車與江離希仁愧予劣抽毫緘此辭

題道士問答圖 二首

下士不識道求之言語間曠哉至人心澹然幽且閒松  
檜滿澗壑白雲冠崇山清風四邊來流泉出其間鉅之



極無外微之入無端欲辨忽已忘我心奚所宣

玄珠在赤水象罔乃得之孰能解其弢澹然入無思和  
氣一以攝神明將自來談天不為高履地不為卑冥冥  
而昭昭至精良在茲

夏日直閣呈諸寮友

深殿閔清晝高閣集南薰復茲對芳樹幽蟬時一聞華  
饌因時設冰壺亦屢陳輕簾織纖絺逍遙晨與曛但希  
三命恭寧知四體勤永歌伐檀什愧彼南畝氓

戲題小畫寄黃教諭重美

離思不可歇長淮浩悠悠  
況茲涼風至日夕郊原秋  
喬柯俯庭綠芳叢轉逕幽  
琴席晨初敞爐曛夕未收  
因風托微韻遙憶此良遊

題平林秋曉圖

我昔忝科甲弱冠登玉堂  
綉衣飄芬芳游歷古山川  
高盼邈四海遐觀窮八埏  
雲物客中變歲月馬上遷  
常憶秋曉時騎出齊魯間  
沈蕩孟諸野莽蒼龜陰田  
四顧不

可極茫茫但雲烟時聞雞犬聲寧辨陌與阡泰山若蹲  
虎隱在東南偏豁然海天白紅日出其巔長空獨鳥飛  
遠岫孤雲還林木森成列矗若筍與盤綠者蒼雲密赤  
者經霜妍黃碧或間之綵繪紛相宣涼風健馬骨颯踏  
馳爭先據鞍倒金樽野中割肥鮮仰視天蕩蕩高懷浩  
無邊開口詠遠遊思若長河懸詞鋒銳莫敵揮霍干戈  
鉞得意自擊節時復揚其鞭別來十餘載承恩廁英賢  
朝遊玉堂內暮直瑤階前顧問日從容宛然瀛洲仙時

窺山海圖指點窮周旋壯遊少所歷夢寐亦復然今者  
遇夫子袖圖示我觀明窻試開卷彷彿如當年邂逅逢  
故人能無谷音歡雲隨目力遠思入秋空玄長河待巨  
檝蒼生望深淵功成拂衣歸與子同盤桓

題駱氏積善堂

浩浩江漢水匯茲千仞淵高高華與嵩雲雨出其巔由  
來豈晨夕積之良使然倚仗固冥昧誰謂情無端砰訇  
有餘響鬱岵無虛年一簣方自茲懷哉嗟汝賢

挽畦樂處士梁先生

三首

逝水赴大壑白日傾西山浩浩陽陰移誰能出其間養  
形奚足存委順乃所安乘化而逍遙寧復懷咏嘆  
達生固無憂遺世乃觀化高舉出九霄星辰在其下陰  
陽為爐炭萬物皆土苴何必殉夭歿滯情悲外假  
殤子匪為夭彭生匪為壽千駟或若無令德在不朽鴻  
冥或蜚聲豹隱不可覲盤桓一世中昭晰千載後

黎氏載酒堂

玄鶴出蓬海丹鳳來崑丘曾是青雲姿而將雞鶩儔  
黎生西江彥聲華滿南州一語重然諾千金懷壯遊  
白壁不易緇明珠豈輕投結客開華堂窮茲山水幽  
飄搖蒼崖雲浩蕩澄江流杜若與夫容開花滿滄洲  
軒車集賓友樽俎更獻酬烹鯉間魚鱉急管隨名謳  
騁酣低白日笑傲凌清秋金谷寒露零梁園白雲浮  
綠水揚洪波萬事隨悠悠榮悴固如此不樂復何求

題鄭敬常壽藏詩卷

莫英識弦望蟪蛄知春秋自非達士懷寧忘千載憂造  
化有興沒聖賢誰能留壯哉千金軀淹忽隨東流蒙園  
一何誇雍門一何愁委身順大化曠然逍遙遊

贈袁舍人忠徹

袁子海上來華年抱奇術遠之金臺遊遂為龍門客立  
談拜雙壁再見賜千金烜赫日月光浩蕩風雲心五侯  
不敢狎七貴遙相待獨步羣賢中高視九州外一朝隨  
龍飛我冠登鳳池紫誥承天恩彩筆揮英辭朝趨金鑾

殿暮直蒼龍闕鳴珂禁苑風錫宴金閨月而我踈朽質  
乃於天上逢握手玉堂迴論文丹禁通冠玉豈長貧燕  
領自食肉抵掌青雲中相看笑流俗丈夫未得志或為  
愚者欺咄嗟洛陽婦叱咤淮陰兒騷駉異款段荆僕豈  
燕石不逢樂與和吁嗟何人識虎變不足驚明月知我  
心因君秉清鑑一奏高山音

鄒氏吳江書舍

大道如青天六經著日月羣賢揚其光粲然衆星列胡



為千載後雕蟲事鑽穴殘竹侈漢偽遺灰昧秦闕魚豕  
竟難辨鄭衛互相越白石抵真壁跛牂騁遐轍喧啁寒  
蟬鳴蕭瑟秋螢滅之子秉遐尚三遷仰遺烈銘心誦姬  
繇正席敷孔說夕忌明月駛朝畏陽景沒獨立披浮雲  
萬里見昭晰道積身可貴理悟心自悅會當探驪龍明  
珠與子掇

題滄浪晚趣圖

日落山水靜蕩舟清溪陰涼風振喬木清音滿前林回

首見遠山迢迢碧雲深佳人殊未來悵然起長吟

癸巳二月十三日扈從奉旨同胡祭酒及同僚

先行渡江有作呈諸公

結綬祗上命嚴裝戒前馳僕夫早在門裘馬爛光輝解  
驂未遑息陟舟此江圻昔往薄隆夏溽暑方炎曦今來  
值仲春楊柳正依依桃李始發逕蘭蓀亦被堤遙空澹  
流雲澄波濯層颿況茲諧明達夙尚寡所違典則恭夏  
訓正直仰周詩眷言騁良圖遠大以為期克宣魏魏德

永永奕世規

大江

積水蕩天地日夜流不息深涵萬象廣靜制羣川溢混  
茫諒天造疏導豈人力巍巍帝王都設險以守國四海  
舟楫會萬方書軌一爰茲拱宸恩共逐朝宗跡若盃感  
玄喻如帶存丹策不獨險可憑由來在務德

舟中望石灰山觀音閣

層岩嵌蓮宇虛簷覆江流日暮微雨來蕭然江漢秋老

禪此栖息鳴鐘伴孤幽飯餘憩高閣洪濤渺行舟逝者  
如斯夫歎息良悠悠

江中觀蕭指揮先渡

暮色含遠林滄洲洒微雨揚帆翼雙漿遠逐前舟侶渺  
渺雲際帆啞啞烟中櫓風來不可期斯流乃如許

感興

曠野多烈風朝日復杲杲扁舟泝江湖日夕在遠道潛  
魚躍洲渚肅肅飛鴈鵠麋鹿游高崗哀鳴求芳草時物

感我心沈思鬱盈抱功名垂千秋容華孰常保彭生云  
修齡豈能免終老

雜詩

春日多遠思翹首以遐望美人在雲間遺我金玉章我  
欲往從之道路邈其長展轉坐永日入夜不能忘清風  
來四野啼鳥聞我堂明月揚其輝幽蘭一何芳仰視鴻  
與鴈駕之欲高翔鴻鴈莫我顧攬衣獨徬徨載歌采薇  
詩釋我慨與慷

渡淮

周詩念靡及楚歌懷遠遊方舟泝長淮日入不能休  
洪濤鬱雲興嘉禾遶芳洲皓月出其東孤鴻鳴悠悠  
登艫誠長望聊以寫我憂逝者固如斯吾道將焉求  
永言仰前哲夙夜庶無尤

舟中呈崇壁時彥

深水清且廣淺水狹且濁君子志高遠曲士甘齷齪  
聊且登我舟舒此千里目四野一何遠河山間平陸  
川原

麥苗秀蒼然多佳木況與平生者日夕相與樂開襟彈  
素琴綺絃和其曲宣尼不言命詹尹徒事卜層霄奮長  
翼修途騁高足庶幾遠大志久要義所勗

### 田園居

貧居委丘壑衣食營我身日夕在東皋豈辭辛與勤杖  
策命僮僕荷鋤理荒榛翳翳榆柳川藹藹桑麻村嚶嚶  
諧鳴鳥依依耦耕人父老欣相過共陰田園間時復傾  
一壺聊以解劬顏但令諧吾願躬耕非所歎

過清河口

長淮東南馳泗水西北驚千古相混并茫然以東去扁  
舟亂其流日夕方此渡海色浩無極烈風吹高樹濁流  
揚洪波澄源隱其素涇渭豈不殊由來匪朝暮

再酬時彥

昊穹幹玄化時序相推斥昴畢始昏中瑤光已東直枯  
葵發柔姿潛蚪起幽蟄和風扇淑氣流波渙然碧登高  
望古人丘岡莽今昔形容不可見榮名在金石琴書對



樽酒開懷聊與適君子勤以戒小人酣以溺赫赫而明  
明前賢以自式

登岸縱步因采枸杞

舟行靡昏旦滯此長河曲登高忻所之逍遙散遐矚靄  
靄春陽熙迢迢芳原綠尋幽詎云遠采芳自盈掬遠見  
居人村時憩田家屋鳥雀樹上啼牛羊草間牧豈知冠  
蓋重但道桑麻熟翳翳聞遠歌依依眺平陸日暮上歸  
舟澹焉心自足

憶舍弟淵

長風吹高樹枝葉紛擾亂憂思從中來綿綿不可斷夙  
昔同衾裯今也異鄉縣時或夢我傍攬之何由見登高  
望原野仰視鴻與鴈嚙嚙諧和聲肅肅接飛翰遨遊九  
州內樂此年歲晏嗟我獨何為躊躇以增歎

虞美人詩

七首

墓在宿遷縣五里

妾本寒家女少小在閨門何以醜陋姿乃蒙君子親封  
菲徒見采瓦礫寧所珍感此伉儷恩屏營以昏晨

風雲混草昧龍蛇躍中野日暮望咸陽撫劍獨悲叱長  
驅淮楚間轉戰成皋下婉孌彼妹子聊以娛我者

鉦鼓振山谷旌旗蔽丘原日昃不遑食走馬上高山岩  
巒杳無極下有千仞淵虎豹對我啼風霜凋我顏征人  
懷永歎弱質焉所安

志士重勛業英雄惜疆土楚漢迭相勝縱橫靡朝暮勝  
則常為雄敗則沒為虜丈夫雖鷹揚壯心良獨苦聊且  
馳馬歸樂此歌與舞

瀚上事不集鴻溝志已違黥布且西逝亞父復東歸腹  
心尚如此何況他人為疇昔京索間釋彼父與妻信誓  
且不顧恩好何足追回首望彭城山川鬱崔嵬日暮駐  
我軍勞此戰者疲

今夕復何夕聞彼將士歌中夜為之驚楚聲一何多茫  
茫陰陵道烈風吹崇阿慨慷一悲嘯洪水振層波玄雲  
結重陰飛鳥不敢過天其亡我乎虞兮可奈何

絃絕由調悲歌急知意促妾身豈足念君子當自勗遠

圖在持重戒彼輕與速寧為百代鬼不受一朝辱有骨  
當不朽有鬼長相逐

舟次濟寧

海岱表齊履龜泗奄魯望迢遞列藩集嶽巢孤城嶂飛  
蔓陰阡陌華輶隘衢巷冠蓋靡晨莫劍騎紛來往允惟  
民物滋益見田疇廣魚鹽有遠賈桑麻無遺壤參差野  
樹出芊綿烟草長曠哉川上遊邈矣舟中賞日落笳吹  
聞雨歇河流漲樂土良所稀匪獨山川壯

上巳日與諸公飲酒

斯人寄一世生與憂患并惟茲盃酒間庶以得其情良  
晨況時至草木欣向榮惠風扇郊原百鳥亦和鳴肴核  
無餘品斟酌恣縱橫陶然與天遊況復物我形昔稱王  
子喬服藥以長生于今定何許但有三山名織女無成  
匹牽牛不服耕君當恕我醉此言其可聽

黃御史宗載席分韻得搏字

孟春兆和氣旭日麗以暄庭卉含新萋谷風扇芳原佳

朋樂茲日攜具枉見存肅我文翰友列筵屬清樽仰望  
西山岑俯觀佳木園河水泮餘澌流泉激清源嚶嚶林  
間鳥和音復相宣共謂當盡娛羽觴疾飛騫中酣發微  
詠譔以笑與言遐思邈雲霄奇文馥蘭蓀願已夙淺薄  
幸偕君子論食革慕周行伐檀感明恩申交在敦誼詎  
曰殽與飧

送卜者毛伯時歸常州

羲畫定猶豫周書重稽疑神聖互為用自古皆有之先

生毘陵士早玩連山辭神龜出芳蓮卿雲揲靈蓍玄探  
象外秘妙發心中奇嘗與宋大夫論辨波濤馳揚聲湖  
海上承恩聖明時理悟自不惑心冥可前知吾亦玩占  
者因之贈新詩

讀文天祥詩

炎光淪南服朔風蕩中土受命在倉卒惜此白日暮殺  
身孰云難圖存乃所慕田單奮即墨臨淄忽已舉鄢郢  
不為墟實以包胥故孔明營王業偏蜀猶虎據茂弘起



江左庶以存典午哀哉吾何心與數子遇南望滄海  
雲北眺沙漠路波濤浩無極山川橫氛霧馳驅岩谷間  
冒彼霜與露并日饑不食采薇以為舖玄雲為我陰虎  
豹為我怒時乎其奈何昊天証其素生為丈夫雄死為  
烈士度一身何足惜鑑之以千古

慈幼堂

神匱閱靈鍵仁輿緬遐軌精凝道逾濬志弘施滋侈藹  
藹閨房秀粲粲髻推美呱呱方在襁齔齔欲覲齒蘭蕤

信可念芝英或易萎靡虞沴羣和拔奇愈一七懸黎葆  
積內明珠掇淵底大化無全功遐齡有終祉越人善隨  
俗倉公或屯施沛矣敏且周微哉吝以鄙懷愛良可推  
因家諗茲理

送錙天錫校書之沂州學正

積雪遍四野洪河水崢嶸寒冬十二月送子金臺城子  
行垂絳帷余居侍金闕一割懷鉛刀三秋戀明月憶昨  
識子時我冠登紫微浩蕩湛露恩赫奕前星輝朝遊金

馬門暮直青藜閣學推匡鼎淳文羨更生博一去湖海  
潯山川烟霧深雲飛瀛洲夢月照魏牟心相知愧不早  
相別燕山道冀北多歸鴻淮南欲春草何處最含情東  
風沂上亭他年遣掌故當授伏生經

題方知縣深澹齋卷

五首

志士惜白日達人鑑秋水千尺見底清吾心亦如此卜  
子苦中戰張生勞外蔽漠乎至人心先民以為軌  
東海有巨魚翕施橫滄溟一逢任公釣貪餌遂忘生吾

聞丹丘鳳翽翽遊青冥竹實有餘美醴泉有餘清迴翔  
千仞上繒繳焉所嬰時乎其來儀可以瑞文明

姑射有神人容華若處子渴飲雨露滋饑餐風雲氣慮  
淑神自凝時和物無厲乃知清淨德所感無不至

宓生治單父絃歌坐相忘周湯尉河東竒繞徒自傷池  
深魚樂遊林靜鳥來翔所以漢賢相舍賢避高堂斂之  
清一心施之寧八荒

留侯萬戶封鄭生千鍾仕於道苟無違何妨心水似清

白無磷緇行藏有通否蒼松凌冰霜可為達士勵

黃氏餘秀堂

江水何浩浩上有嘉樹林高堂此逍遙坐見南山岑萋萋時卉繁靄靄浮雲陰有酒自斟酌攝衣獨撫琴戶庭無餘喧山水有遺音永言懷古人何以慰我心

題張真人畫為項御史賦

耆山何蒼然樓臺凌青天門前清溪水遙與蓬壺連日上瑤樹綠春入丹葩妍雙鳥鳴其間華采一何鮮東風

送餘音驚起幽窻眠却誇韓衆鹿飛度三山顛手翳夫  
容枝玉清會羣仙瑤階獻金籙丹廷傳瑤筵緬懷紫霞  
想飄若雲之旋玉童四五人吹笙間鳴絃風掃花下石  
月照松間泉有客天上來袖拂金壇烟素與軒裳契而  
結雲霞緣贈之五采圖重以丹丘言舒卷雖異跡玄同  
已忘筌伊我拾紫芝曾往瀛洲邊手種綠玉樹別來幾  
何年應知碧桃花開遍東牕前赤松未辟穀青雲期濟  
川且為謝青鳥一寄瑤花篇

讀韓文有作東時彥

李杜於文章兩雄力相關彌天振長策萬物因奔驟毫  
芒人間者白日燭宇宙公乎起紹之來自帝左右被髮  
騎麒麟龍鸞蔚先後捫天挾雲漢赤手擘星宿披援蒼  
龍角簸弄丹鳳喙翻身跨長鯨撇捩牙與脰神闕劃靈  
籙鬼窟斲玄窬遂初邈無端高步騁遐觀陰陽罔象類  
戢戢相輻輳無巨細美惡形色聲與臭隨其所喜怒齒  
頰恣凌詬帝欲昌斯文故使起且仆一飯告屢罄五薦

僅乃售間關陽山邑岩壑尹猿狖歸遷法曹掾瘴氣猶  
滿袖洞庭浩漫天寧颺振坤厚孤舟拂蛟吻幾莖危乃  
救勤逾三十載僅有尺寸就白髮冠進賢朱芾映華綬  
栖遲數畝宅垂戒及童幼艱難志仍卓宦達道愈富揮  
毫颺昌言為世拔稂莠釐之八荒外一刷千古垢燭龍  
出海底九域煥清晝橫空障狂瀾萬派盡東走衡雲為  
之豁突兀出衆岫恠蟲畏雷霆竭壑移卵殼豈徒文倔  
奇正直天所佑予嗟生孔晚昧伏愧舛謬平生幸遺文



矧此獲奇授河圖與珠球爛熳在戶牖況茲際昭代雅  
頌日宣奏衆賢騁高躡濟美行見又作詩持似君幸砭  
予謏陋

華山吟送郭公緒之陝西僉憲

太華五千仞削成周四方夫容半天開秀色何蒼蒼而  
我昔遊覽飄搖紫霓裳雲中過太白雪下來溫湯浩歌  
醉新豐拂袖梅花香夜半歷仙掌長嘯明星傍鶴舞瑤  
樹陰月出雲臺涼岩高銀河近天濶松風長俯視六合

間洪河去茫茫却借韓衆鹿西度岐山陽高談帝王畧  
欲釣蟠溪璜別來二十載事久情難忘之子一何秀孤  
英壓衆芳勞持憲臣節西行肅刑綱鞍馬紛照耀交遊  
仰輝光身上五色衣雲霞護神羊高堂振白筆六月飛  
秋霜雞犬夜不驚豺狼自摧藏豈徒示崇高壁立千丈  
強名增古岳重氣與仁風揚倘有冥世士高卧烟霞鄉  
舉手可引之金闕同翱翔去去勉勛業永言贈新章

送陳賞之任廣西僉憲

中夜觀執法明明輝太微乃知繡衣人承恩出皇闈朝  
發洪河津莫即澄江路朔風吹清霜飛度蒼梧去蒼梧  
連桂林山高雲霧深半夜見海日十月間春禽按部花  
縣中間俗青山下官道出榕陰蹠蹠嘶驄馬英聲振列  
城望塵羣吏迎鉄冠珥白筆輝赫嚴天刑虞廷重欽恤  
周家積仁厚蕭艾與芝蘭均之慶雲覆張湯善磔鼠毛  
鷙徒紛紜子產修條章晏然民自淳鸞鳳信委夷鷹隼  
自搏擊苟無濟物心憑陵亦何益子去慎所持前賢以

為期人來報佳政慰我長相思

題漢陰丈人抱甕圖

上書莊子所著與子貢語有助于理故裁之以正  
寸燭不照室勺水不盈野太山出其雲終朝雨天下濟  
物苟如斯寧非通方者安得起斯人與之論玄化

大道本無象末路乃多岐皇皇宣尼父開跡良在茲朝  
發龜山陰暮涉黃河湄微茫公旦夢緬邈東周期捐者  
守其常哲人達其宜不見西郊麟此心安所知

玩藻軒齊梁體

葳蕤轉初景旖旎媚澄漣絲弱纔交渚香波已泛川稍  
冒金塘檝復映鏤渠蓮鳬唼綃紋亂魚戲翠浪圓還應  
悟心賞載咏滄浪篇

送夏文度還錢唐

劇飲未及醉明星出東方僕夫已在門鞍馬儼成裝秋  
風將鴻鵠送子歸故鄉路遠乏親友時康尚文章青春  
鳳凰闕遲子復來翔

送江克恭還南京

予友江克恭將還南京索予文屬有采薪之憂未能也勉賦詩一篇庶幾表予之衷云宗兄儀之郎中倘觀此又必有以教我

秩宗典禮樂自古稱夷夔子去獲所從況逢明盛時廓落瑚璉器瀟洒瓊樹枝風雲壯氣節波濤湧文詞六館衆所羨七步人皆知新拜南宮官羣僚早見推祝釐肅時事佐禮光朝儀于時八九月馬首東南馳天高鴻鴈

遠露冷蕪葭披綠楊生涼風祇足攬予思今者復南來  
六月赫炎曦雲連禾黍郊日照夫容池朝參有當度日  
夕肩相隨未盡契濶情復言離別期自愧草玄宅囊無  
沽酒資閉關抱餘瘵兼之十年悲愁至苦自遣情鍾當  
語誰擺落南華篇沈吟伐木詩藍田出白壁綠烟鳴黃  
鸝丈夫意氣合不在把酒卮雨涼黃塵淨河濶孤舟遲  
歸見王子猷吾宗推白眉醉後示斯作揮毫為和之

滴翠軒為求無已賦

萬木藹幽潤千崖散秋色蕭條映戶深霏微入簾碧影  
逐花雨飛韻與泉流急觀空意無染習靜心俱寂即此  
悟真如一寄空飛跡

鍾山書舍為傅主事賦

文豹隱深霧潛蚪閱重淵晦美寧陸

闕

雲騫予

生秉微尚夙懷企前賢不羨季子金

闕

溺田或哂

莊叟放頗輕楊子玄遺經時自披

闕

載絃曠觀宇

宙外高卧羲皇前經世慨遠圖采

闕

衆言蕭條長林



下清川興悠然理愜物無忤慮關心自專榮新美簪紱  
戀舊悵雲烟輕售孰云貴昧初良致愆德音庶勿違芳  
塵期永傳

送張行素之任臨淄

予友張君行素將任臨淄以詩留別而獎諭過當  
予不敢當也然行素卓然欲以文學自見於世故  
予倚而和之以見行素之志如此他日必致於遠  
大且以致區區之意焉

昊穹若傾蓋冥然四連水孰能察其端倪之以玄理陰  
陽無停運萬物皆吾體君子法其行日進焉能止倚君  
清時彥邀跡溪山裏谷雲本無心因風乃時起鸞鳳豈  
樊籠芙蓉出泥滓詞源倒東海浩汗孰可涖輝煌瑚璉  
貴特達瑤璋美嗟予忝先達敢與才俊齒屢見顏忸怩  
胸中鬱生痞日飲不覺醉常欲沃淳醴故衣去積垢常  
欲清流洗離別不可留思心日千里昭代各勉立永言  
蹈遐軌

葉氏山亭

虛亭青山水木自生陰  
微雨朝來過開軒見遠岑  
悠然酌春酒醉後時復吟  
鳥鳴堦前樹花落牕間琴  
迢迢望白雲來往一何心

全沖齋為孫醫士賦

吾聞秦越人昔遇長桑君  
飲此上池水刀圭遂通神  
寂寞千載後君復揚清芬  
寶鼎飛神丹泥丸養天真  
香生橘井泉花開杏林春  
韓康守藥價宋清焚券文  
願從乞

靈訣永以和天鈞

題墨竹為周員外宗武賦

肅肅高館靜對此修竹林焚香坐終夕澹然怡我心  
虛牕度幽韻涼飈散餘陰微雨從南來沖思浩盈襟  
因之理瑤瑟托以瑤華音永懷佳人節如玉復如金

挽袁太常廷玉

豪傑有不遇自古恒歎之先生獨昂藏蚤識龍鳳姿  
憶在弱冠日巍然已瓌奇神觀岩下電穎捷囊中錐高視

羣物表獨遊東海涯路逢蓬萊仙奇書以見遺宵渺許  
負術廓落唐生機明珠不掩類白璧知其疵騏驥喜見  
收駑駘愁為嗤被褐三十年抱玉無人知歎逢聖明主  
徵起東山陞秉笏對便殿裁冠侍龍墀列坐容臺中高  
講虞廷儀錦綉五色段黃金雙褱蹄內醞白玉壺恩賜  
無虛時梁木倏云壞慘澹風雲悲寂寞薤露歌淒涼老  
成詩空令後來者淚洒堂前碑

題盛子昭山水為陳景中賦

雲白山黛青橋平路如掌柳岸搖春暉桃蹊陂晴漲地  
偏亭宇幽林深苑閣敞於焉促席談於焉事琴仗動靜  
那異趨共此泉石賞

題俞生愛菊軒

秋至霜露降百卉萋以腓獨此籬下菊金葩粲歲蕤採  
之酌盃酒時還吟我詩浮雲澄遠空微雨間涼颼俯仰  
穹壤內不樂復何疑

滴翠軒代人作

釋子契玄昧開軒俯雲林苔花夾幽蹊香蘿香深沈露  
井滴餘潤風牕藹層陰對景已迢想悅耳非假音真源  
諒斯在允諧塵外心

題徐子信郊齋玩易圖

揚雄讀書處門對終南山心將白雲遠意與流水間玄  
經那可道勝事空相關媿彼射科者白首游長安

五言律詩

奉和胡學士光大侍從遊萬歲山詩韻十首

鶯啼紫殿風春暖萬花紅綠樹連秦塞青山繞漢宮旌  
旗移曉嶼歌吹落晴空回首都城望雲烟杳靄中

馳道花邊出清泉樹杪分錦衣行白晝珠旒拂青雲露  
柳深春色風蘭散曉芬承恩多樂事寧與外人聞

閣道雲中迴峰巒雨外奇竹林深傍水花徑細分歧扇  
影低春燕爐烟駐晚絲自欣逢勝覽畢竟不知疲

春樹隱宮鴉春風滿殿花洞門深處暖雲閣望中賒綠  
水明瑤席青山轉翠華承宣陪宴者重賜鳳團茶



楊柳千門曉鶯花萬國春  
珥貂黃閣老揮翰玉堂人  
聽鳥教收弋觀魚止下綸  
從茲億萬歲同荷發生仁

飛旆臨丹壑鳴鑣陟紫臺  
日邊雙鳳下雲裏六龍來  
寶殿臨空敞璫筵就水開  
共誇青瑣客陪宴栢梁回

步輦度龍樓青春展豫遊  
徑從深樹轉泉帶落花流  
宛轉雲峰秀清涼雪洞幽  
晚來移綵仗歸到鳳池頭

飛燕語雕梁幽階轉翠簷  
玉芝常滿地珠樹不知霜  
曲水通雲竇虛亭近石房  
回看移蹕處佳氣晚蒼蒼

殿閣青霄迴山川紫氣高門開天上日地壓海中鰲響  
徹蒼龍管陶傳碧甕醪共懽千載遇登賞總忘勞

紫殿藹絃歌青春惜綺羅雲林留野鹿烟島放籠鵝宴  
鎬皇風遠橫汾勝覽多侍臣魚藻詠歌頌滿岩阿

送金生歸江南

朔雲千萬里歸興復如何鴻雁雨中去薰葭霜後多人  
烟投遠戍驛路出長河惆悵東橋別涼風起暮波

送曾生自燕歸吳

二首

天空一鴈飛之子乃言歸驛路逢秋雨關河對夕暉楚  
田菰米熟吳國鱉螯肥不似遊京洛緇塵染素衣  
積雪徧河關長亭落照間一樽當暮別千里共春還烟  
樹連平野晴江帶遠山東風薊城路幾日到長安

送吳太僕還南京

初日映朝衣承恩出瑣闥幾迴天上見一騎雪中歸野  
色連春樹河流帶晚暉交遊徧京國達者似君稀

送廖訓導

客路臘初盡河橋冰向開言辭故人去遙逐早春回江  
館低烟柳山郵發野梅懸知問字者正億子雲才

饒氏山亭

千峰秋色裏幽處有池臺閒見白雲上坐看微雨來酒  
樽松下酌棋局草間開偶值山僧訪談玄殊未回

李郎中粉署餘清卷

鳴佩趨丹闕焚香坐粉闌禁城鍾鼓靜人吏簡書稀幽  
鳥鳴高樹涼風動紫微明時仍宦達誰不羨恩輝

龍潭八景為魯侍講賦

九峰疊翠

窈窕連丹壑，岩堯聳碧岑。  
映空留夕照，飛翠作春陰。  
明月松間酌，清風竹下琴。  
永懷青瑣客，同此滌塵心。

雙江流水

碧嶂雙流合，仙源一派分。  
珠光迴夜月，玉氣暖春雲。  
細藻凌波轉，芳蓀隔渚聞。  
還聞應人瑞，五色浪成文。

龍潭出雲

片影涵虛谷清陰覆遠山從龍到天上為雨徧人間捲  
幔春看度鳴琴夕望還夜深明月下隨意繞松關

虎溪積雪

溪水不可極蒼然生暮寒重陰晦平陸飛雪滿空山鳥  
雀寒爭下漁樵暝未還洛陽車馬客誰解問袁安

平湖夜月

積水夜空濶澄波惟月明天迴珠斗近秋共玉壺清露  
渚蘭蓀氣雲汀鶴鶴聲滄浪有餘興還此濯塵纓

喬木春陰

高堂有嘉樹蒼翠獨參天氣接扶桑外春歸萬木先院  
涼闕簾月軒暝北牕烟即此同先德芬芳百世傳

竺臺蘭若

寶刹凌青漢珠宮倚翠岑燈懸千劫影鐘落半空音花  
雨長廊靜天香別殿深尚懷風夜月支遁此追尋

武城絃歌

名家繼昔賢遺教已千年禮向鄒人問書從孔氏傳橫

琴清夜月高咏暮春  
天予亦狂歌者空懷  
泗水邊

舟過石灰山和胡若思祭酒韻

積水望不極蒼然迷遠空  
山川千古壯舟楫萬方通  
樹隱滄洲霧潮回碧海風  
春聲將別意併入棹歌中

儀真道中

王程不可緩孤棹且宵征  
古渡無人語長空惟月明  
湖連四野濶天與大江平  
明發維揚郡登臨益愴情

湖中夜望



一望幾千里層波蕩遠空舟行星漢上天入混茫中歷  
歷平田樹悠悠別渚鴻揚舲自可樂況與故人同

過寶應縣

茅屋自成聚門前湖水流平蕪遙見塔小港曲通舟檣  
日留飛燕帆風起白鷗江湖多逸興況是及春遊

桃源道中

日出遠林曙鳥鳴春野陰青山不盡色流水自成音鼓  
枻諧吾志觀瀾愧此心悠悠江海上樽酒且長吟

宿遷晚眺

小店對長河，扁舟向晚過。那知南路遠，已覺北音多。鴻鵠投烟渚，牛羊下草坡。晚來聞鼓柁，誰向月中歌。

舟中雜興三十首

旅況異憂

一作幽

樂高懷，同古今。共承明主惠，不愧昔賢

心。把酒山月白，弄琴江水深。永言白雪調，千載有餘音。春浦曉鳴榔，烟銷江水長。佳人愛綠水，漁父詠滄浪。遠鴈雲邊下，芳蓀露裏香。舟行意自豁，誰說是他鄉。

古渡下斜日孤烟生遠村人家住江口潮水到柴門白  
髮思親老丹心戀主恩扁舟千里外但與故人論  
驛路出名郡維舟淮水隈春山對海盡暮雨送潮來擘  
榜客宵濟鳴鐘城旦開言從省方狩不是棄繻迴  
河堤芳草逕淮浦綠楊津估客多吳語征夫半楚人燕  
飛村落曙花發驛亭春風景年年別扁舟過此頻  
二月春雨晴交交桑扈鳴婦人林下饁田叟野中耕一  
逕木綿發滿園桑葉生東皋有別墅悵望獨含情

迢遞長河路微茫泗水亭橈聲撥曉霧帆影帶春星宿  
鴈鳴孤渚驚鳬下遠汀誰人歌古調鄉思若為聽

悠悠去淮甸望望涉河津不惜尋芳草其如思遠人鐘  
聲長樂曉柳色上林春須信班生策非闕衛霍親

古道長河外郵亭落照邊登高極分野眺迴出風烟獨  
樹邊淮海孤鴻入楚天圮橋有遺迹倍此憶前賢

隔河見壩落桑柘滿平川牛卧春田雨人喧晚渡烟江  
湖懷聖澤花柳惜芳年明發金臺路承恩玉殿前

右渡江至下邳之作

三春白下別千里薊門行獨對東風酌時聞幽鳥鳴山  
迴鄒子國路出濟州城誰識凌雲客重來賦兩京

平原帶遠疇古道夾長楸雲氣來芒碭天文接斗牛山  
臨曠野出河入大荒流蕩浩平生志從茲萬里游

故國徧芳草高臺多大風河山千古在登眺幾人同野  
澤鳴山雉荒陂起塞鴻新豐不可見烟樹五陵東

墟里鬱相望田家多華門牧豕向大澤維舟來遠村麥

苗沙上秀烟火雨中昏賴有同袍者幽懷喜共言

山海包齊國龜蒙盡魯田濟流深入地岱岳上齊天野  
樹春雲合州城曉霧連勝遊方自此乘興未言旋

向晚望鄒嶧臨風倍感情明經齊博士習禮魯諸生暮  
鳥投空堞春苗入廢城永惟闕里宅金石有遺聲

屢向鄒人問言從孔氏儒隱輕齊石語狂竄魯連書漢  
店荒城在秦碑劫火餘緬懷觀禮射臨去獨躊躇

曠野杳無際孤舟齊魯間河流東下險天氣北來寒古

道蒼烟迴長亭落照閒微茫雲水外一點是梁山

草色連遠近人烟時有無河翻暮雨急山入海天孤遠  
道憑知己安居愧役夫棹歌何處發清思遶江湖

官亭柳色新客裏度青春風雨孤舟夜江湖遠路人明  
時歎才薄舊業憶家貧安得南飛鴈題詩慰老親

右下邳至東昌之作

淄澠連即墨濟鄆出東阿海上人多詐桑中女善歌賣  
絲趨曉市驅犢向春坡幾度從仙蹕觀風此地過

擊筑間鳴箏家家歌吹聲淳于為贅婿方朔是狂生蠶  
老青樓紡人間綠野耕媿予非蜀客敢起弄琴情

古戍暮雲深飛沙起夕陰人烟迷草澤客路出榆林日  
落空山獸風高火野禽前程殊未已彌慙壯遊心

渺渺涉長道悠悠動遠思家貧憐弟幼路遠憶親慈獨  
鴈何時到孤舟盡日遲永懷陟屺什還詠棣華詩

四野望不盡雙鷗飛自閒滄溟淪碣石落日照榆關遠  
嶼烟波黯孤城海氣寒因之歎秦客從此覓三山



長河不可渡三月剽狂風寒日低關樹飛沙雜塞鴻暮  
聲連朔漠春色上居庸誰信經遊遠翻令志氣雄  
春雲向曉開海色映蓬萊枕上春流響牕間夜月來  
勛懷玉塞訪古問金臺翻笑陰符客高車自此迴  
白馬紫絲韁吳鉤百寶裝悲歌迴易水射獵過遼陽  
白草胡沙迴黃雲漢塞長任教身作將全勝世為郎  
驛路南來遠都城北鎮雄海紅初出日雲黑乍生風  
放馬沙場上開田野燒中秦關百二險應與此方同

山海環恒岳星河遠析津言從三殿客共作兩京臣視  
草瓊樓曉看花玉署春自慙疎鈍質何以答楓宸

右東昌至北京之作

晚過金溝

桑柘滿平疇人家古渡頭暮烟深帶雨春水淺膠舟野  
火明山店寒更起驛樓誰知蘇季子三月尚貂裘

新開河

江漢思周德河山表禹功聖謨千載上經始萬方同海

國舟航集蕃夷寶貨通憑將太史筆磨石照蒼穹

望北京

歷數昭天命河山壯帝京乾坤包萬國日月照羣生鳳  
向平林下人間遠塞耕從今億萬歲長以奉皇明

孤山清趣為林宗潤題

積雪滿山逕寒梅千樹花水鄉雲外迴月影竹邊斜靜  
愛人來少吟看鶴去賒逍遙謝塵俗誰復慕仙家

送孫謨還錢唐兼東其父孟博

見子如親面題詩當寄書相思千里外已別二年餘江  
煖梅先放城春柳尚疎懸知積陰德重得此明珠

碧梧山房

高僧何處去飛錫返東林積雪山中路浮雲世外心鳥  
啼松院靜花覆石床深寂寂猿聲夜誰聞清梵音

送夏文度還錢唐

相見復相別知心寧用愁逸鱗開積浪孤隼奮高秋雨  
店丹陽市風帆白下舟重遊應不遠清景幸同遊

送求上人

積水浮杯去誰云借路行鶴隨飛錫影猿識誦經聲  
山閣看雲出花臺坐月明喜同清淨志相與話三生

送友人歸杭

上國人南去澄江鴈北飛驛亭逢暮雨客路試春衣  
黃入宮鶯淺青含苑樹微重來題漢柱於爾識光輝

送周御史叔治使西蜀

岷峨接漢川百丈帶江烟夜月臨關驛春風上峽船  
山

經行處美人識舊官賢會擬揚雄賦歸朝玉殿前

送嚴學廣歸越

干越東南望家山繞夢思世途多窘捷儒術豈磷緇暮  
雨孤舟暝秋風兩鬢絲從茲揮手去悽惻曠襟期

夜宴西渡別任御史

離宴城西路青年美繡衣水聲喧隴樹夜色散林扉妙  
舞羅縠薄狂歌錦瑟微明朝驄馬路霜冷曙鳥飛

春日登紫雲絕頂

絕頂乘春望興懷  
宇宙間女牛中分野  
吳越共江關  
聲教覃諸夏  
梯航貢百蠻  
逢茲全盛日  
畢景未言還

昭君怨

掩淚向邊州  
君恩此日休  
身隨胡地遠  
心是漢宮愁  
鴈塞春難到  
龍沙草易秋  
玉容何足貴  
翻作羽林羞

銅雀臺

玉座憐紅粉  
銅臺生紫烟  
含愁下長袖  
冷淚濕繁絃  
野鳥歌陵樹  
山花照墓田  
從茲朔望日  
不復見芳年

長安道

秦塞山河壯新豐車馬繁八荒朝異服萬國被殊恩柳  
拂金張第花明許史門酣歌喧白日拔劍繞芳樽

從軍行

沙漠聚烟氛喧喧動六軍兵符分上國戎服映關雲報  
主持高節捐軀立異勲願將三尺劍一為解時紛

邊將

年少羽林郎安邊問虎狼分符入縣度馳馬出胡羌寶



劍橫秋水彤弓拂曉霜邯鄲歸面縛麟閣動輝光

金臺送別二首

朝回遇故人微雨洒芳塵萬井鶯聲滿千門柳色新  
時登紫禁失學歎青春每憶西齋夜論文勸酒頻  
相遇復相別其如離思何雲連山色遠春入柳條多  
驛路寒逢雨江洲暖漲波應知千里鴈長待北風過

哭鄭二參政

豪氣動奎光金門謁帝王朔南歸聖治冠冕出殊方  
綠

樹孤墳在青山百越長若為官舍裏風暖荔枝香

留別章二珍

祖道大江西春風黃鳥啼石危山路轉地險海城低浦  
淑夕陽盡人家烟霧迷孤舟今夜泊猶自未分攜

五言排律

送黃學士嚴翁思恭榮受誥命還永嘉

昭代風雲會亨衢雨露辰恭惟聖主詔嘉是近臣親鶴  
髮登丹掖龍章下紫宸榮光迴瑞日喜氣薄高旻萬乘

知名久羣公接對頻饌分瓊署美醴送玉壺醇稱體衣  
裁錦橫腰帶鏤銀異恩知感激高節見嶙峋待漏常過  
夜觀光況值春山河環禁籞江漢接天津苑樹雲連綠  
宮花日上新御樓時見鳳靈囿或觀麟寵數今超等聲  
華固絕倫珪璋凝器局冰雪瑩精神積德于公遠傳經  
漢輔淳潛深疑有待濟美迴無鄰自喜瞻先達何如忝  
後塵幾回聯桂席復此送蒲輪秋氣初傳雁涼風正爽  
人還將歲寒節瀟灑對松筠

臨清肺

鳴笳出古鎮掛席凌長河風湍下灘險春色入關多津  
樹朝烟合汀花暮雨過榆錢綴古岸行帶亂迴波順水  
揚舲去中流擊節歌非復鄉關感遺思在岩阿

曉過德州

河廣連宵濟城高拂曙通樓臺開曉日鼓角散春風俠  
客浮雲劍將軍明月弓揚旌過薊北走馬向山東碣石  
河流外蓬壺海霧中誰知扈蹕使不是棄繻童

過直沽城

水出漁陽地山橫薊北天  
高樓瞰海日遠嶼入江  
烟市集諸蕃舶軍屯列郡田  
風高激刁斗霧重濕旌旃  
匪獨關河壯由來節槩全  
精兵亘雲朔勁騎出幽燕  
大漠黃塵外三韓落照前  
將持定遠策不用繞朝鞭

送柴員外叔輿扈從北京

萬乘揮天鉞三邊靜戰氛  
錦鞍天廐馬金甲羽林軍  
陳列龍蛇勢旗張虎豹紋  
指揮回日月開合動風雲  
聖略

宣神武奇材策異勲鳴鑣青海外飛旆黑河濱玉帳論  
兵法霜華草檄文礮聲飛霹靂劍氣接氤氲驍裒從教  
騁葡萄每賜醺重窮螻蟻穴生縛虎豹羣帝業千年盛  
天威萬里聞功成封定遠麟閣播清氛

題黃學士八世祖宋校理袞告身三道後十二  
韻

渙汗前朝物輝煌五色書簪纓七世後文獻百年餘相  
印者仍在官階憶屢除藍田雖產玉滄海竟遺珠令胄

才華盛明時寵渥殊英聲騰甲第高步躍雲衢待詔留  
金殿談經冠石渠誥頒龍寶重錦織鳳文紆爵命覃前  
代恩榮邁古初流芳應益遠積善信無虛球壁非常器  
璠璵尚謹諸勉旃忠與孝千載耀門閭

九日宴集分韻得涵字

彈冠登玉署開宴列華簪騷裊嘶金埒葡萄出紫墀更  
香和露重菊蕊著霜酣鱸斫河魚美梗炊晚稻甘鴈行  
凌朔氣山勢壓秋嵐美具人皆適懽多事總堪雲烟飛

細扎珠玉間清談筆陳傾韓白辭鋒挫禹弇棋偏虛處  
擊鈎忽暗中探巧詫防城瞿雌嘲守柱眊齊窮猶借一  
曹敗或過三地迴瞻天近恩深頌海涵仕非干水鑑官  
即帶冰銜禁草頻宣視天香屢賜含已看空冀北寧復  
滯周南舜曲歌民阜周詩戒士耽誰云賢博奕還以慎  
朝參即此聯嘉藻庸疎祇自慙

詠雪與寮友同賦

應律呈天瑞先春泄化機氣凌坤軸勁潤溢土膏肥稍



喜參差集俄驚汗漫飛橫空方欲驟隨霰乍教稀簾幙  
輕穿隙溝池巧傍碕試深頻卓杖諤曉屢褰帷野聚蛟  
蚪結山填虎豹饑遠排胡塞濶高壓瘴烟微崖石攢銀  
冑岩松植素旂漫將齊物色寧欲競芬菲華表瓊千尺  
層城玉四圍璫璣橫道路年麥遍郊圻沼靜圓留壁階  
明碎委璣陶廳紛布屑袁巷蒼翁盈扉貧惜者爭積兒癡  
玩不揮咏工雖似韞言好總如徽入地深河潤連天助  
日輝厚彌增皎潔高不壓崔嵬玉燭茲方應金穰定可

祈豈殊游閨苑況是值仙聞緩酌羔羊酒寬披鶴氅衣  
詫奇文尚白誇勝博投緋鼓舞三農慶搜羅萬象歸聊  
歌似同列郢曲敢言希

周叔冶御史怡親樓

賢親躋上壽華構軼歆氛山岫當樓出溪泉到檻分松  
筠晴駐景桃李暖迎曛湖影虛牕月峯陰靄棟雲白華  
頻咏樂烏府況超倫人避青驄馬天頒紫誥文慶流方  
舄奕佳氣益氤氲榮養人皆羨攄忠上所聞願推魯閔

志常以奉明君

夢萱堂

萱堂違色養萬里閔音容五鼎悲何及三泉夢可通  
斷機疑自織時服尚親縫慈竹當軒翠宜男遶砌紅  
訓兒敦禮樂呼婦出簾櫳共獻三春酒俄驚五夜鐘  
屋梁低曙月庭木咽秋風自喜頻相見那知總是空  
茫茫蓼莪恨千載復何窮

五言絕句

題竹寄友人孫孟博

涼飈肅餘音微雲澹清影美人期未來獨立清秋迴

題畫

青山映簷低綠樹出雲齊何處長安道紛紛過馬蹄

題梅

懷哉此佳人春顏美如玉清夜月明時弄珠江水曲

題畫四景

綠樹藹佳色青山明曉霞春風到幾日開遍一庭花

林樾暑不到水亭涼氣多白鷗飛復下隨意點蒼波  
南山一千丈秋色共崢嶸開樓遲佳色聽此松風聲  
沈沈萬壑靜杳杳千山白何處孤舟人凌寒蕩空碧


春草圖

二首

牧羝邊塞潤車馬華山多雨露滋仁化風霜奈爾何  
獵騎迷行迹歌姬襯舞裙郊原春雨潤野色望中分

題二喬

宮鳥弄青春烟花拂繡裯誰知傾國者亦有看書人



毅齋集卷三